

## Scolaziun complementara a la professiun per il stgalim secundar I

(cc) Las personas d'instrucziun da la scola primara dal Grischun duain pudair cuntanscher a la Scola auta da pedagogia dal Grischun (SAPGR) a Cuir il diplom d'instrucziun per il stgalim secundar I, e quai complementarmain a la professiun. La SAPGR è vegnida incumbensada da la regenza da porscher l'atun 2013 en collavuraziun cun la Scola auta da pedagogia da Turitg ina qualificaziun posteriura complementara a la professiun (studi 2013–2016). Il concept latiers è gia vegnì approvà dal cussegl da la SAPGR. Per il studi che dura 3 onns vegni fatg quint cun custs totals da var 1,83 milliuns francs per 20 personas en scolaziun. Sch'il basegn vegn cumprovà po vegnir cumenzà l'atun 2016 cun in nov percurs dal studi.

Gia dapi plirs onns constateschan las scolas dal Grischun ch'igl è fitg difficil da chattar personas d'instrucziun per il stgalim secundar I ch'èn scoladas conform al reglament. Perquai vegnan pli e pli personas d'instrucziun cun in diplom d'instrucziun per la scola primara engaschadas sin il stgalim secundar I. Il biro per studis sociopolitics e da lavur (Bass) a Berna ha constatà l'onn 2010, che – tut tenor la regiun linguistica – fin a 45 pertschient da las personas d'instrucziun da linguas sin il stgalim superiur eran engaschadas senza ina scolaziun correspundenta e che fin a 90 pertschient da las scolas han exprimì ch'ellas hajan difficultads da chattar personas d'instrucziun scoladas adequatamain per il stgalim superiur (secundar e real). Questa situaziun è s'engrevgiada anc pli fitg en il fra-temp. Igl exista in basegn interchantunal ed – en vista a la qualitad da l'instrucziun – er la necessitad da realisar dal 2013 fin al 2016 il nov studi en la SAPGR.